

Prinzenproklamation, WDR, 13. Januar 2019

Es gilt das gesprochene Wort!

Leev Fastelovendsfründe,

„Uns Sproch es Heimat“ unger däm Motto kumme mer hee en dä Session zosamme. Met unser Sproch un unser Aat zo fiere, gewenne mer de Hätze vun dä Gäss, die em Fastelovend he sin. Do stonn Brasilianer nevwwe Chinese un Kölsche nevwwe Düsseldorfer un singe: „Ich mööch zo Foß noh Kölle gonn.“

Mäncheiner es esu vun de Söck, dat hä nit weiß, wie hä et sage soll un kütt zo däm Schluss: „Et gitt kei Wood, dat sage künnt, wat ich föhl', wenn ich an Kölle denk'.“

Gemeint es natörllich: Ich han se esu gään, die „Stadt met K“.

Über kei Stadt gitt esu vill Leeder wie über Kölle. Un baal all sin et Liebesleeder üvver uns Heimatstadt.

Äver et jitt och Kritische: „Mir sin die Weltmeister vom Rhing em fiere, blamiere, klüngele, strunze, lamentiere, Stroß oprieße, Dux verbaue, de Aussicht op d'r Dom versaue.“ Weil äver jede Kölsche Ton direkt usem Hätz gerad us op dich zu kütt tut dat dann nit esu wieh.

Kölsche Bands sin nit nor em Fastelovend aktiv, sondern jöcke meddlerwiel durch de ganze Republich. Musiker us verschieede Jeneratione un och de Jeste aal fiere zosamme. Se all drage de kölsche Sproch un uns Levvensgeföhl e Stöck vun unser Heimat – erus en de Welt.

De Welt zo Gass en Kölle – dat trifft nit nor op de Jecke zigg zo. Kölle es bunt, tolerant, met vill Facette! En unser Stadt wunne Minsche met insgesamp 182 verschieede Nationalitäté. All met eige Sproche oder eigem Dialek.

Trotzdäm flupp bei uns de Verständigung super.

Denn Kölsche sin zweisprochig. Un zweisprochig, dat heiß, et es egal, wat för en Sproch de Muul schwaad. Et Hätz sprich en universelle Sproch. Et es en Sproch, die Zosammehald un Fruhsenn usdröck.

Uns designeet Dreigesteen es der schönste Bewies doför. De Freud am Fastelovend, am Zosamme-Fiere un an der kölsche Sproch verbingk üvver Grenzen erus. Hee en dä Session esujar beim Trifolium, dat sich dis Johr us drei Fastelovendsgesellschaftte zosammeschlüüß.

Ehr lävt et uns vür. Drei Heimate. Ei Daach. Dat Daach es der Kölsche Fastelovend. Da kumme aal zosamme um ze Singe, ze Danze un ze Laache.

Wie god Ehr singe künnt, leev designeet Dreigesteen, dat probiere mer jetz ens us.

Leeve Marc Michelske,

do solls et Fastelovendsvolk regiere un met im de Villfald fiere. Versprichs do, all glich zo regiere, egal, wat för en Herkunft de Jecke han? Dann sing **de Stammbaum**:

INSIGNIE

Dann gevven ich dir jetz hee die Pritsch.

Met ehr häs do de Maach üvver dat jecke Volk.

Ich proklamiere dich zom Prinz Karneval Prinz Marc I.

Leeve Markus Meyer,

als Buur solls do dich medden unger et Volk mische un all de Jecke dat Gefühl gevve, en der Welt gebore un en Kölle zo Hus zo sin. Versprichs do, met inne zo fiere wie met eschte Fründe? Dann sing vür uns *do bes Kölle*.

INSIGNIE

Dann kriss Do jetz hee vun mir de Stadtschlössele för uns schön Kölle.

Ich proklamiere Dich zom Kölner Bauer Markus.

Leeve Michael Everwand,

als Jungfrau waachs do leev ävver streng un met Hätzlichkeit üvver de Jecke. Versprichs do, denne, die et üvverdrieve, der Speegel vürzohalde? Dann sing mit us *Halleluja*:

INSIGNIE

Dä Speegel zeig dir, wat hinger dir passeet. Su häs do hingen Auge un sühs genau,
wenn einer sich donevve benimmp.

Ich proklamiere dich zor Kölner Jungfrau Catharina.

Op uns Dreigesteen,

op unse Kölsche Fastelovend,

op uns Heimatstadt Colonia,

Dreimol

Kölle – Publikum: Alaaf

Kölle – Publikum: Alaaf

Kölle – Publikum: Alaaf